



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

**Komunikadu Imprensa
Parlamentu Nasional
22 Setembru 2014**

**Bankada CNRT no FRETILIN apoiu iniciativa JSMP kona-ba kestaun
Indultu Prezidensial liuhosi intervensaun legislativu**

Iha 17 no 19 Setembru 2014, JSMP hala'ó audiénsia ho Xefe Bankada CNRT Sr. Natalino dos Santos no Vice Bankada FRETILIN Sr. Francisco Miranda Branco hodi diskuti kona-ba kestaun Indultu iha Parlamentu Nasionál.

Iniciativa audiénsia ne'e bazeia ba preokupasaun JSMP nian relasiona ho práтика indultu prezidensial ne'ebé hamosu debate kontroversial iha nível sosiedade hot-hotu depoisde presidente ezerse nia kompetensia hodi fo indultu ba prizioneriu sira balun iha loron boot referendum, 30 Agostu 2014 liu ba.

Xefe Bankada CNRT Natalino dos Santos apresia no apoiu iniciativa JSMP nian atu lori agenda kona-ba asuntu indultu hodi diskuti ho sira nia bankada. Deputadu Natalino afirma katak, Bankada CNRT sei konsidera JSMP nia hanoin sira, nune'e bele hare'e no analiza di'ak liu tan bainhira governu apresenta Proposta Lei Indultu ba iha Parlamentu Nasionál.

Durante ne'e CNRT no bankada sira seluk iha iniciativa atu ezbosa projetu lei ruma, maibe hasoru difikuldade tanba laiha asesor legál atu apoiu sira nia servisu. Tanba ne'e mak lei barak sempre mai hosi governu no Parlamentu Nasional halo apresiasaun no halo alterasaun ba artigu sira liuhosi komisaun no plenaria depois aprova.

Iha parte seluk Vice Bankada FRETILIN iha nia intervensaun katak FRETILIN ninia pozisaun ba asuntu korupsaun no asuntu violasaun seksuál ka asuntu INSESTU ne'e laiha fatin atu hetan indultu.

FRETILIN mós konsidera atu fo indultu ba prizioneriu sira, ne'e kompetensia konstitusionál presidente da repúblika nian. Maske nune'e, FRETILIN hanoin katak tenke iha esepsaun ba kazu sira ne'ebé involve interesse publiku nian. FRETILIN apresia ba iniciativa JSMP hodi lori asuntu ne'e ba diskute no fó hanoin ba FRETILIN atu konsidera, tanba indultu hanesan kestaun ida ne'ebé sai preoukupasaun ema hotu nian.

JSMP hanoin katak importante atu Parlamentu Nasional bele hola iniciativa lejislativu ruma hodi prevene situasaun hanesan mosu iha futuru. Prosesu ne'e, importante atu asegura katak ezersiu

poder konstitusional prezidente kona-ba indultu tenke ezerse iha maneira ida ne'ebé ekuilíbriu no proposional.

JSMP observa katak práтика ezersisu poder konstitusional kona-ba indultu iha potensia boot atu kontinua hamosu problema no kontroversial kuandu la iha mekanismu lejislativu ruma atu kontrola prosesu ne'e iha futuru.

Sein kuadru legal ruma Prezidente sei halo desizaun bazeia deit ba Prezidente nia konviksaun politiku no la konsidera esforsu hosi instituisaun sira seluk ne'ebé halo esforsu hotu ne'ebé posivel atu hametin justisa.

JSMP hanoin atu asegura katak kazu sira ne'ebé involve interese publiku hanesan krime korupsaun, violasaun seksuál ba menor, insestu no omisidu sira tenke iha aliasaun no konsiderasaun ida ne'ebé profunda antes halo desizaun. JSMP prefere atu husu ba PN se posivel tenke limita kompetencia prezidente atu iha esepsaun ba kazu hirak ne'e iha futuru.

“JSMP fiar katak utilizasaun poder indultu nu'udar kompetencia ne'ebé Konstituisaun RDTL fó ba Prezidente Repúblika no nu'udar direitu prerogativu Prezidente nian. Maske nune', importante atu iha lei ida ne'ebé guia prosesu ne'e no se posivel atu limita komptensia ne'e hodi ezerse iha maneira ida ne'ebé proporsional,” dehan Diretor Ezekutivu JSMP Luis de Oliveira Sampaio.

JSMP mós akresenta katak bele iha indultu ba kazu hotu, maibe tenki asigura labele hamosu presidencia ne'ebé la di'ak ba públiku no aleiza esforsu instituisaun judisiária atu dezenvolve no harii konfiansa povu ba setór justisa, partikularmente iha kazu korupsaun sira ne'ebé buras ba bebeik.

JSMP rekomenda atu prosesu indultu ka kualker forma ne'ebé Prezidente utiliza tenke iha opsaun atu hamenus pena gradualmente, la'os hasai total hosi prizaun hanesan práтика sir ne'ebé durante ne'e akontese. Ida ne'e sei hametin liu tan povu nia konfiansa ba instituisaun justisa no limita interpretasaun no persepsaun publiku katak, justisa ba ema kiik de'it.

Audiénsia ne'e ensera ho entrega JSMP nia submisaun kona-ba indultu ne'ebé JSMP produz ona iha tinan 2010.

Atu hetan informasaun kle'an liu tan favor kontaktu:

Luis de Oliveira Sampaio
Diretor Ezekutivu JSMP
Telefone: 3323883 |77295795
www.jsmp.tl
Facebook: www.facebook.com/timorleste.jsmp
Twitter: @JSMPtl